

愛
吾
廬
詩
稿

近體詩

觀書有感

國魄詩魂繞楚洲，騷人長逝賦空留。
愁深如許知何似，不盡長川日夜流。

早寒有懷

蒼茫曉色枕衾單，未到晨鐘夢影殘。
不許陳搏千歲臥，輕風寒霧透窗欄。

秋夜懷遠

切切寒蛩繞室鳴，燈前不寐憶離情。
墨箋小字當時語，欲遣相思奈月明。

秋夜懷遠

月明雲淡晚風清，獨坐窗前伴短檠。
乍憶舊遊多少事，思量一夕夢難成。

詠史

平原莽莽起塵飆，塞外胭脂豔色凋。
沙漫長空秋景冷，風驚歸夢故園遙。
微驅易與君王別，韻態難由國手描。
祗願天威傳絕域，不須漢女赴胡朝。

睡覺

山枕橫敲錦被舒，南窗慵困戀華胥。
晨鐘底事偏驚夢，不許陳搏臥晏如。

籠中文鳥

雪羽靈軀受困羈，嗔將紅喙啄銅籬。
玲瓏青瑣幽閣外，別有地天爾不知。

深夜

蟲靜蛙歇葉落時，夜深長臥入眠遲。
九天雲霧重重砌，十月秋飈獵獵吹。
心怯風寒窗緊鎖，身懷多病意多思。
每憐小鼠留殘飯，相伴無猜人不知。

月

天垂夜幕地寧安，玉彩雯華護廣寒。
異代滄桑多變改，古今一月共看觀。

春愁

東風舊識又來尋，團扇幽姿寂寞深。
離別經年音訊斷，幾春心事寄瑤琴。

飼雛

膠管手持拌粟糊，溫濡黃米飼饑雛。
軀身輕弱揮嬌翅，毳羽纖微見粉膚。
對喙爭喧鳴啾噪，並頭偎暖倦垂顛。
一眠一寸勤生長，代母劬勞旦夕舖。

送容辰入伍

一派煙愁帶酒狂，騷人落拓又何妨？
師門未許歸鬢宇，兵部先催入陣行。
徭戍邊關聞角鼓，行吟野路賦辭章。
盛唐氣象多如此，不必牽衣話感傷。

女子吟 言女子渴望婚姻與愛情自由

紅拂女

夜求傑士自媒姻，不用鸞裳飾嫁身。
勝卻長安朱戶女，一生苦樂只由人。

賀雙卿

素粉芭蕉暗愁情，苦扶病骨事炊耕。
蘭根抱定砂岩地，風日摧逼度一生。

文成公主

華車寶蓋出金鑾，化夷奇功蓋百官。
深夜藏宮聞佛曲，依稀歸夢到長安。

董小宛

玉蕊冰綃滿樹繁，莫教吹落染汗痕；
元章去後誰工寫？至今梅園憶畫魂。

蘇蕙

五色針梭急去來，相思獨在機中裁；
願成千字迴文錦，能把君心繫得回。

夏日即事

坐消長日帶愁顰，煩惱如絲絆此身。
且向睡中圖避世，那堪麻雀喚人頻。

月下聞曲

星河隱隱夜風侵，踏月行歸獨自吟。
此際有人同不寐，小樓深巷按鋼琴。

憶鳥

寂寞容光閉畫門，誰當共憶舊晨昏？
陽臺獨立看秋色，高掛空籠招鳥魂。

夜燈

風冷軒窗夜色幽，黃光照案靜而柔。
手持墨筆勤精益，人對韋編力進修。
章句時疑頻俯首，神靈偶倦屢低眸。
未眠竟夕誰為伴？不語秋燈是我儔。

夕陽

燕雀歸時動晚風，萬山搖曳舞丹楓。
阿誰擊破天邊日，染得秋雲徹底紅。

古體詩及樂府詩

秋色

涼風舞秋芒，天表寒雲色。
南嶼無雁至，別來無消息。
田壟收割罷，野火焚荊棘。
人倦黃昏時，愁思滿胸臆。

賃居三興村

輾軻驅舊車，仲夏移新居。
心遠無炎燠，吾愛吾廬好。
粉牆白如霜，石地潔而涼。
晝出田園碧，鳳梨滿郊陌。
幽徑龍眼垂，黃槿迎朝暉。
日長真無事，轉眼黃昏至。
夜臥聽蛙聲，蟲蛄相對鳴。
守宮啼驚夢，蟾華明窗洞。
處此何營求？清風消百憂。

臥病

寒風吹田野，臥病成憔悴，
坐立不能持，咳喘動肝肺。
饑鼠繞床覓，無人相憐餉，
塵灰積房中，筆閒書卷廢。
嘆我當春年，愁衰無儀態，
凡人非神仙，養生豈易事？

代白頭吟

堅如荊山玉，直如嶺南竹。人生各有志，莫言遇不淑。
來時同車載，去時獨自歸。夜深寒風緊，獵獵拍人衣。
易得連城珍，難得同心人。結交在相得，使能百年親。
男兒好功名，女子重情義。謝君惜日憐，從此各自愛。

玉米

玉米在壟，舒葉覆踵。躡彼黃土，我築新冢。

憐爾幼殤，尚在懷藏。何為不壽，中道夭亡？

玉米長莖，其色菁菁。至彼田邊，我掘新塋。
羽翮初豐，思向蒼穹，倏忽仆地，不得善終。

玉米欣欣，其穗紛紛。持彼鋤鏟，我作新墳。
肝腸縈牽，旦夕熬煎。唯盼爾安，享其天年。

詞

卜算子

君去海峽西，暫作神洲客。陸地東南島嶼浮，海水雲天隔。
朝夕不堪憑，消息無端的。人靜風柔獨自愁，暗計君歸日。

菩薩蠻

抹胸豔色如初染，參差亮片隨姿閃。妝粉兩頰勻，膩香凝絳唇。
裙移羅襪步，烏辮纏金縷。歌舞管絃濃，難遮憔悴容。

喝火令 所飼文鳥飛去，追尋不回。

何故生雙翅？載卿去不還！任儂和淚憶從前，巷尾巷頭尋遍，憂慮苦熬：
夜暗誰憐護？饑寒自覓餐。此去難回，此去莫情牽，此去地長天闊，何處問
平安？